



Siunnersuut uunga: Isumaginnittoqarfiup aqunneqarnera aaqqissuussaanelu pillugit Inatsisartut inatsisissaat nr. xx, xx.xx. 2016, tamatumuuna allanngortillugu isumaginnittoqarfiup aqunneqarnera aaqqissuussaanelu pillugit Inatsisartut peqqussutaat. (Kommunit isumaginninnikkut ingerlatsinerisa atorunnaarsinneqarsinnaanerat)

(Ilaqutariinnermut, Naligiissitaanermut Isumaginninnermullu Naalakkersuisoq)
(Siullermeenera)

Demokraatininngaaniit Ilaqutariinnermut, Naligiissitaanermut Isumaginninnermullu Naalakkersuisoq qutsavigerusupparput meeqqat inuusuttullu atugaat pitsanngorsarniarusummagit kiisalu inuiaqatigiinni ulorianartorsiortut atugaat aamma Naalakkersuisunut tamanut qujaarusuppugut meeqqat inuusuttullu pingaartimmatigit. Tamanna tamatta pisariaqartipparput.

Nukillalaarnarsimaqaaq uagut pisortat tungaanniit aatsaat ukiorpassuit ingerlareersut nassuerutigisimagatsigu Kalaallit Nunaanni meeqqat inuusuttullu peroriartortarmata meeraanerminnik innarlerneqarsimallutik, killilerneqarsinnaasimagaluartunik pisortat pisuni assigiinngitsuni annertusisamik iliuseqarnissaminnut periarfissaqarsimasuuppata aamma qunusuillutillu akissaqarsimasuuppata nalunaarutigineqartartut iliuseqarfiginissaannut. Suli nukillalaarnaqaaq innuttaasut ulorianartorsiortut sualummik meeqqat inuusuttullu ajornartorsiortut ikiorniarlugit akissat nukiillu suli ajornartorsiutigatsigit. Iliuseqartariaqarpugut aamma pisariaqarluinnaqqissaarpoq ataatsimoorluni alloraqqissaarnissaq; kommunit, Namminersorlutik Oqartussat, sulliviit, atuarfiit inuiaqatigiillu tamatta qisuariartariaqarpugut, iliuseqartariaqarpugut aamma meeqqat inuusuttullu innarlerneqartarnerat naaggaarluinnartariaqarparput. Peqataanik politikikkut ikiuiumalluta aningaasaliissutaasartut amerlisartariaqarpugut pingaartillugillu.

Nassuerutigisariaqarparput immaqa allatut ajornartumik nunarsuarmi eqqaamiutsinnut ikiortissarsiortariaqassagatta - aamma politikikkut sakkortuumik suliniarfigisariaqarparput inunnik isumaginninnermi meeqqat inuusuttullu pillugit immitsinnut ilungersunartumik artukkersimanerput aaqqinniarlugu.

Aamma isumagalugu illersorneqarnissaminnut, isumassorneqarnissaminnut aamma ikiorneqarnissaminnut pisinnaatitaaffiisa - naagga piumasaqaataasa malinneqarnissaat, ajornartorsiorpata imaluunniit ineriartornissaat ulorianartorsiortinneqarpat.



Siutigut amiilerpagut oqalulluta naammattunik periarfissaqarata, naammattumik inuit ikiorsinnaanatiq imaluunniit naammattunik sulisussaqaqarata inissiiivissaqaqarataluunniit il.il. Eqqortoq sakkortoq oqaluttuaannangortittussaavarput, tulleriaraluta.

Naalagaaffiit Peqatigiit Meeqaat pillugit isumaqatigiissutaasa siunertaanut tunngatillugu ernumanaannartumik kinguarsimavugut - kisianni ilaatigut manna inatsit tunngavigalugu periarfissaqalissaagut iliuseqarnissatsinnut.

Kommunit suliassaq artorpassuk taava Naalakkersuisut ikorfiiinnaalissapput, ikiuussinnaalissapput, piumasaqarsinnaalissapput aamma periarfissanik innersuussisinnaangussapput sinaakkutit sukkulluunniit piusut iluanni.

Erseqqissassavara Demokraatini isumaqannginnatta una inatsisissatut siunnersuut kommunit namminersorlutilluunniit oqartussat pisinnaatitaaffiik innarliisoq imaluunniit Tunngaviusumik inatsisimmi § 82-mut akerliusoq.

Paarlattuanik isumaqarpugut inatsisissatut siunnersuut pisariaqartoq, nersortariaqartoq aamma iluaqusiissasoq kinguaassiutitigut kanngutsaattuliortarnerup, sumiginnaanerup, persuttaasarnerup imminulluunniit toquttarnerup akiorniarnanni.

Erseqqissartuassavarput isumaqaratta uani inatsimmi inersimasuinnaat eqqarsaatigineqanngitsut kisiannili inatsit meeqqanut tunngasoq aamma inatsisaasoq meeqqat immikkut pillugit.

Nunarsuarmioqatigut kanngusuttariaqarpugut, ilaqutariinni meerartalinni meeqqanik inuusuttunillu kinguaassiutitigut kanngutsaattuliortarnerit, angerlarsimaffinni persuttaasarnerit, aannajaarniutunik atornerluinerit il.il. pillugit kisitsisit eqqarsaatigalugit sakkortuumik iliuseqartannginnatta.

Qularutissaanngilaq matumani pineqanngimmat pisuutitsinissaq - massakkorpiaq uangutsinnut tamanna soqutaanngilaq siunissami assigusut peqqeqqunagit pitsaaliunngikkutta.

Akisussaaffiup inissinnissaa pineqarpoq.

Akisussaaffik aaqqiissutissanut matuersaataavoq.

Demokraatini inuiaqatigiinnut ulorinartorsiorfitsinerpaatut isigaarput nunami maani meeqqat inuusuttullu pingajorarterutaasa ajorluinnartunik atugaqartinneqarnerat.

Meeqqat innuttaasullu ajornartorsiorujussuartut pillugit akisussaaffik inissinngikkutsigu aamma iliuseqanngikkutta, sutigullu tamatigut sapinngisarput tamaat iliuseqanngikkutta - immikkoortumi ataatsimoorluta kivitseqatigiinngikkutta - taava tunniutiinnassaagut - siunissarpullu tamatsinnut aserorlugu.

Naalakkersuisut manna inatsisissatut siunnersuut aqutigalugu iliuseqartariaqarneq alloriarfigaat taamaattumik sutigut tamatigut taperserpagut.

Naalakkersuisut matumani erseqqilluinnartumik oqaatigaat kissaatigigitsik, pisuni naliginnaangitsuni immikkut iliuseqartarnissaq inatsisitigut tunngavilerusukkitsik tamannalu



isigerusupparput kommunitut ikiuinertut aammali inuiaqatigiinnut ersarissumik sakkortuumillu kalerriinertut, innuttaasut sumiginnarneqartarnerat siorasaarneqartarnerallu - aamma meeqqat inuusuttullu - piumasattaamik atorneqartarneat atonerlunneqartarnerallu aamma akuereqqissinnaajunnaaripput, ajorigipput, iloriusissaaleqqeqqinniingitsugut isiginngitsuusaqqinniingitsugulluunniit.

Nalunngilarput aqput takissaqisoq, ingiaqatigiittariaqarpugulli, alloraqatigiilluta anguniagarput angussiillugu.

Naalackersuisut peqataanik erseqqissarpaat, kikkut tamarmik soqutigisariaqaraat suliasat imaannaangitsoq siunitsinniittoq ikioqatigiilluta kivittariaqaripput. Tamanna tapersorsorluinnarparput.

Demokraatini takorloorarparput ullut ilaanni nunap inoqqaavinut allanut naleqqiulluta siuarsimasortaalerumaartugut meeqqat inuusuttullu pisinnaatitaaffiisa isumaginissaat eqqarsaatigalugu.

Inuiaqatigiit taamaattut pilersittariaqarpagut, inuiaqatigiit taamaattut anguniartariaqarpagut. Siunissaqanngilagut meerartaqaratalu inuusuttortaqanngikkutta.

Aaqqiissutissat suleqatigiissutigisariaqarpagut eqqartuinnarnagit.

Arlaat orluppat nikuseqqinnissaanut ikiortariaqarpagut.

Arlaata pisussaaffini sakkortuumik sumiginnarpagit, pillaaasinnaasariaqarpagut, iluarsisariaqarpagut iliuuseqarlutalu.

Taamatut oqaaseqarluta Naalackersuisut saqqummiussaata siunnersuut tapersorsorluinnarparput.

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititaliamut innersuupparput kissarluta suleqatigiilluartoqarumaartoq.